

BERATUS JUTA DIPELANJA KENA NGEMANSANGKA MODAL MENSIA

September 3, 2016, Saturday
Dikarang Chris Bishop//

The Borneo Post



KE PENGINGAT: Bediri baris mua, tiga ari kanan – Kadim, Fadillah, Jabu enggau Empiang begambar begulai enggau raban ketua Unimas tembu pengawa kemari.

KOTA SAMARAHAN: Perintah seruran beratka pemansang modal mensia ke alai ratus juta ringgit dipelanja ungkup tuju nya, ku Menteri Kereja Raya Dato Sri Fadillah Yusuf.

Bejaku rambau Majlis Ikrar Pelajar UNIMAS Sesi 2016/2017 di DeTAR Putra kemari, iya madahka pemansang ukai semina fokus ba modal mensia ke benung belajar di universiti tang bela mungkur bala graduet ti udah nembuka pelajar.

Ku iya ti mega Menteri Mentor UNIMAS, nengah Pelin Pemansang Pelajar Tinggi Malaysia, perintah nagit ngangkatka peratus 'kebolehpasaran graduet' ngelui ari 80 peratus.

“Perintah pechaya pemansang modal mensia patut seruran dipejalai lalu semua kita tu aset menua.

“Ketegal nya perintah sanggup ngeluarka modal ke besai ungkup pengawa tu,”ku iya.

Majlis Ikrar Pelajar Unimas sesi 2016/2017 kemari dikemujur pro Canselor Unimas Datuk Patinggi Tan Sri Alfred Jabu.

Sepenyampau 3238 iku nembiak ari serata menua nyengkaum pelajar antarabansa ari Yemen, Bangladesh, Arab Saudi, Jordan, Indonesia, Brunei enggau Mauritius ngerejista diri nampung pelajar di Unimas ungkup sesi 2016/2017.

Ngenang kaul ke sama, Fadillah mega ngansak bala nembiak nyadi chunto manah ngagai komuniti.

“Rindu tauka enda, komuniti deka meratika kita semua nyadika teladan enggau chunto.

“Tu ukai tanggungpengawa ke mudah ke alai kita meseti nentuka chunto ti dipandang ngagai komuniti sebengkah chunto ke manah ungkup pemaik komuniti,”ku iya.

Nembiak baru Unimas ungkup sesi 2016/2017 udah ngerijista diri kena 27 enggau 28 Ogos tu tadi lalu udah nempuh Program Aluan Pelajar.

Bela datai Tan Sri Empiang Jabu, Mandal Canselor Unimas Prof Dato Dr. Mohamad Kadim Suaidi enggau orang bukai.